

Por ende, sy esa dicha çibdad quisiere gozar del dicho benefiçio e encabeçar las rentas de ella e los lugares de su partido e juresdiçion que estan encabeçadas prorrogar el encabeçamiento de las dichas rentas para los dichos quatro años, enbiad ante los contadores mayores vuestro procurador de aqui a en fin de mayo de este año, que ellos vos prorrogaran el dicho encabeçamiento, e sy fasta el dicho tiempo no enbiaredes mandare arrendar las dichas rentas e despues no se vos daran por encabeçamiento syno cargandovos la puja que en ellas se oviere fecho.

Fecha en la çibdad de Toro, a veynte e quatro dias del mes de henero de mill e quinientos e çinco años. Yo, el rey. Por mandado del rey, administrador e governador, Gaspar de Grizio, e dos señales syn letras. E el sobrescrito dezia: por el rey al conçejo, justiçia, regidores de la çibdad de Murçia.

13

1505, enero, 27. Toro. Provisi3n real ordenando al conçejo de Lorca que acepte a Garçi Tello como corregidor de la ciudad otro año (A.G.S., R.G.S., Legajo 1505-1, fol. 86).

Doña Juana, eçetera. A vos el conçejo, justiçia e regidores, caualleros, escuderos, ofiçiales e omes buenos de la çibdad de Lorca, salud e graçia.

Bien sabedes como el rey mi seõor e padre e reyna mi seõora madre, que aya santa gloria, ouieron proueydo a Garçi Tello por su corregidor de esa dicha çibdad.

E porque mi merçed e voluntad es que de aqui adelante el dicho Garçi Tello huse de su ofiçio segund que fasta aqui ha vsado, fue acordado en el mi consejo que devia mandar dar esta mi carta en la dicha razon e yo tovelo por bien, por la qual vos mando que ayais y tengais al dicho Garçi Tello por mi corregidor de esa dicha çibdad segund que fasta haqui lo aveis tenido.

E los vnos ni los otros no fagades ni fagan ende al por alguna manera so pena de la mi merçed e de diez mill maravedis para la mi camara e demas mando al ome que vos esta mi carta mostrare que vos enplaze que parecades en la mi corte del dia que vos enplazare fasta quinze dias primeros syguientes so la dicha pena, so la qual mando a qualquier escriuano publico que para esto fuere llamado que de ende al que vos la mostrare testimonio sygnado con su sygno porque yo sepa en como se cunple mi mandado.

Dada en la çibdad de Toro, a veynte e siete dias del mes de henero, año del nascimiento de Nuestro Seõor Ihesuchristo de mill e quinientos e çinco años. Yo, el rey. Yo, Miguel Perez de Almaçan, eçetera. Liçençiatu8 Moxica. Dotor Caruajal. Liçençiatu8 Santiago. Rodericus, dotor. Liçençiatu8 Polanco.

